

之法 荅曰省疏具悉所陳之事自有朝廷處置爾其退修學業仍下大同廳  
大同廳覆啓曰聞大同之法江原一道民情甚便之今見儒疏果符所聞限今  
年仍行不罷之意頃已停當無容更議矣○乾方有氣如火光○癸丑諫院請  
罷新除授寶城郡守宋豈 荅曰宋豈上年有歸順之忠嘉其為國之誠除授  
此任矣不可以既往之咎棄忠義之人勿為更煩累啓乃命逆差○禮曹啓曰  
王世子冊禮後 殿下將行會百官之禮而百官不可盡參依上壽宴例二品  
以上及堂下侍從之官當為進參令掌樂院姑以男樂隸習何如 上曰連歲  
凶荒百姓飢饉此非宴樂之時其停之○都元帥李弘胄遣從事官稟議軍務  
於廟堂備邊司啓曰帥臣李弘胄遣其從事官南斗瞻稟議軍務於本司其一  
前年各種分防之軍僅萬餘人而今年二月以後替戍之軍措處事也其二江  
邊鎮堡中尤甚殘敗防備不緊處為先革罷合入於附近鎮堡事也其三西邊  
列邑中有山城舊基處令本道修築各自為守以為聲援事也其四毛將所需  
貨糧及各鎮軍餉下三道米豆及今料理解冰後趁即舡運事也其五兩西軍  
器蕩然無存烏銃尤難辦備京都監及下三道監兵營優數分定措備下送事  
也 上皆許之山城修築事命姑勿施行○甲寅右議政申欽又上劄乞解